

## La panchina

Mi cullucaru 'ncapu lu marciapèdi  
'nta la chiazza davanti lu municìpiu.  
'Nn'haiu ascutatu di cotti e di crudi  
'sta panchina pari un cunfissiunali  
è propriu adatta pi ccu voli sparlari.  
Ah! Si putissi parlari!

Cci dicissi a lu ziu Pè  
ca avi corna a tinchitè,  
iddu sulu nun lu sapi.  
Avi corna passati e frischi-frischi  
dda santa donna di so muglieri  
cci li fici d'ammatinu propriu ajeri.

Quantu laminteri haiu 'ntisu pi 'stu sinnacu!  
Ognunu ca s'assetta ccà, mìnimu avi deci laminteri.  
Mi pàrinu comu li deci cumandamenti.  
Primu - 'un nn'ha fattu chissu e chiss'atru,  
secunnu - la munnizza è fina 'mucca arrivata,  
terzu - l'acqua è troppu cara divintata.

Po, vulissivu sèntiri quannu  
s'assèttanu 'napocu di viddàni.  
Signuri scanzatininni!  
'Stu minchia di sinnacu  
penza sulu a la pizza-festa  
e l'aranci? Cci li sbattemu 'ntesta?

Natri avemu bisognu di espurtari  
li frutti di la nostra terra,  
li frutti ca curtivamu natri,  
imprimis vennu l'aranci,  
si nun trovi mancu 'n'appigliu  
carruzziati tutti cosi, cogliti lu stigliu.

Cci su quattru ca pàrlanu di lu spitali,  
dicinu ca ormai è comu 'na molla,  
tecchia dicinu ca resta, tecchia dicinu ca chiudi,  
tutti parlanu, tutti scrivinu, ma nuddu fa nenti,  
lu spitali a va ristari e sa va sapiri custudiri  
accussì li vicchiareddi sannu unni jiri.

Di fimmini nunn' hai vistu ma assittati,  
pi sparlari su li megliu, su ammaistrati.

Li 'ntillittuali pàrlanu diversi.  
Sai, questo sindaco va cacciato via,  
non è all'altezza di governare  
e soddisfare il fabbisogno del paese.

Qui ci vuole un sindaco con le palle,  
che trova i soldi e non ci racconta balle.

Tutti lischi e loschi, pàrinu milordi,  
po jèttanu paroli fora fitusi e lordi.

Si pi casu 'na fimmina passa davanti  
'sta panchina, 'sti burduna ca cci su assittati  
un vi dicu chiddu chi cci nesci di 'mucca.  
La vattianu di la testa a li pedi.  
Chista fici chissu, chidda fici chiss'atru  
prima era cu unu e po si misi cu natru.

Orba di l'occhi, sugnu stuffu di sèntiri  
'sti mali chiàcchiari di 'sti schiffarati.  
'Na matina mi truvàru spasciata, mi pigliàru  
e mi jittàru 'nun magazzinu a lu scuru.  
Arrifriscavu! Nun sentu cchiù sparlittamenti,  
nun vidu e nun vi pozzu cuntari cchiù nenti.

Natra panchina piglià lu me postu.  
Curaggiu, cc'è arrè di sparlittari,  
cci nnè pi lu metiri e pi lu pisari.

2015 Giuseppe Cardella